

**Pertindihan kerusi PAS dan PKR selesai, kata Anwar Ibrahim**  
**Malaysian Insider**  
**April 23, 2013**  
**Oleh Md Izwan**

PETALING JAYA, 23 April — Ketua Umum PKR Datuk Seri Anwar Ibrahim hari ini berkata pertindihan enam kerusi diantara PKR dan PAS sudah diselesaikan antara kedua-dua parti komponen Pakatan Rakyat (PR) itu, cuma kerusi Dewan Undangan Negeri (DUN) Kota Damansara yang masih lagi dibincang.

Anwar berkata PKR telah bersetuju untuk menarik diri daripada bertanding tiga kerusi DUN di Terengganu, manakala PAS pula bersetuju memberikan laluan kepada PKR di kerusi Parlimen Labuan serta dua kerusi DUN di Panti, Johor dan Sungai Acheh, Pulau Pinang.

“Setelah bermesyuarat dengan kepimpinan tertinggi PAS, isu pertindihan enam kerusi sudah selesai cuma kerusi Kota Damansara sahaja yang masih lagi dalam perbincangan,” katanya.

“Oleh itu, isu pertindihan kerusi dianggap selesai.”

Dalam pada itu, Anwar berharap Suruhanjaya Pilihan Raya (SPR) supaya dapat membuat pindaan dengan membuang nama calon PAS dan PKR yang menarik diri dengan memberi alasan agensi tersebut mempunyai masa yang banyak untuk bertindak sedemikian.

Semalam, Pengerusi SPR Tan Sri Abdul Aziz Yusof berkata pihaknya tidak akan memadamkan nama calon yang sudah berdaftar memandangkan itu sudah termaktub dalam undang-undang baru yang diperkenalkan.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/pertindihan-kerusi-pas-dan-pkr-selesai-kata-anwar-ibrahim/>